

## Gil Alves; Hau Sei La Rejigna An, Tamba Hau Fiar Deit Primeiru Ministru

Contributed by Domingos da Silva  
Thursday, 18 March 2010

CJITL flash, Ministru Turismo, Comersio no Industria &ndash; MTCl, Gil da Costa Alves liu husi konferensia ba imprensa, Kinta feira ohin konfirma katak nia sei la rejigna an husi nia kargu tamba ema ne&rsquo;ebe iha kompetensia atu hasai nia mak Xefe Governu la&rsquo;os publiku ou membru deputados.

&ldquo;Hau sei la rejigna an, ema ne&rsquo;ebe bele halo evaluasaun ba hau nia servisu no bele hasai hau mak Xefe Governu deit la&rsquo;os tan ema seluk, hau sei la rejigna an&rdquo; Gil konfirma ba jornalistas ohin.

Relasiona ho distribuisaun fo&rsquo;os ne&rsquo;ebe diskunfia iha manipulasaun husi MTCl rasik, Gil defende katak funsionario MTCl la halo manipulasaun maibe grupo spekulator balun hanesan empzariu sira mak aproveita fali prosesu distribuisaun fos ne&rsquo;e.

&ldquo;Xefe suco sira mos la sala, governu ou funsionariu sira mos la sala, ema ne&rsquo;ebe sala mak naok ten sira no spekulator sira ne&rsquo;ebe gosta aproveita tempu&rdquo; Gil hatutan.

Ba oin, MTCl sei la distribui tan fos ba comunidade liu husi Xefe Suco, oras ne&rsquo;e MTCl halo ona restruturasaun atu hadia jestaun fa&rsquo;an fos.

&ldquo;Ba oin, kada familia sei hetan kartaun ida, depoiz ho kartaun ne&rsquo;e mak familia ida sei sosa fos governu nian ho marka MTCl tuir nesesidade familia nian, no familia ida sei sosa deit fos tuir numero membru familia nian&rdquo; Gil haforsa liu tan.

Hatan perguntas CJITL karik anulasaun ba despacho atu la distribui fos liu husi Xefe suco ne&rsquo;e tamba presaun husi publiku, Gil hatan katak desizaun ne&rsquo;e laos tamba presaun husi publiku.

&ldquo;Despacho ida ho numero 445/GM/MTCl/XII/2009 ne&rsquo;e laos husi Primeiru Ministru mak hasai, maibe iha momentu ne&rsquo;eba hau sai hela ba liur, enton hau fo hela pasta ne&rsquo;e ba Primeiru Ministru hanesan MTCl interinu, nune&rsquo;e despacho ne&rsquo;e laos husi gabinete Primeiru Ministru nian, hau la kontra PM maibe hau hakarak defende no hadia naran Primeiru Ministru nian&rdquo; Gil salienta liu tan. (Domingos/CJITL)